


# TEZAU LITURGIC

**31 MARTIE**

# SLUJBA SF. CUVIOS FILARET DANILEV DE LA GLINSK



**MOSCOVA, 2000**



# СЛУЖБА

## преподобному отцу Филарету, игумену Глинския пустыни

### НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихиры на 8, глас 4:

Приидите, стецемся, вернии, / приспе день  
светлаго торжества, / монашествующих,  
соберитесь, собори: / днесь увенчаем песньми  
похвальными / блаженнаго игумена Глинскаго  
Филарета, / постников и пустынников красоту,  
/ и послушания твердое основание.

Наста, богоносе отче наш Филарете, /  
светоносный твой праздник, / и озаряет  
монашествующих лики, / и бессмертием  
облагоухает; / темже днесь, вернии, сошедшеся,  
/ воспеваем и ублажаем любовью подвиги твоя,  
/ и молитвенника тя ко Христу предлагаем / о  
душах наших.

Крест Господень взем, преподобне Филарете, /  
ревностно последовал еси Христу, / нас ради  
волею распеншемуся, / и Его ради любве вся  
оставил еси, / и Того единого возлюбил еси, /  
Егоже моли спастися нам.

Приидите днесь, лица монашестии, / притецем  
ко гробу преподобнаго отца нашего Филарета, /

молящеся Христу Богу нашему, / просяще  
грехов прощение, / Церкви и миру устроения, /  
и душам нашим велия милости.

Слава, глас б:

Светлый возсия нам и всепразднственный день,  
/ якоже второе солнце, / просвещая, и  
наставляя, и отгоняя тьму помрачения нашего, /  
верных созывает любовью / к честней раце  
мощей припадати и облобызати ю. / Моли,  
молимся, отче наш Филарете, / дати миру мир /  
и душам нашим велию милость.

И ныне, глас тойже: Кто Тебе не ублажит:

Вход. Прокимен дне, и чтения 3.

Премудрости Соломоновы чтение (глава 3):  
Праведных души в руке Божией, и не  
прикоснется их мука. Непщевани быша во  
очесех безумных умрети, и вменися озлобление  
исход их. И еже от нас шествие сокрушение, они  
же суть в мире. Ибо пред лицом человеческим  
аще и муку примут, упование их безсмертия  
исполнено. И в мале наказания бывше, великими  
благодетельствовани будут, яко Бог искуси я и  
обрете их достойны Себе. Яко злато в горниле,  
искуси их и, яко всеплодие жертвенное, прият я.  
И во время посещения их возсияют и, яко искры  
по стеблию потекут. Судят языком и обладают

людьми, и воцарится Господь в них во веки. Надеющиеся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломоновы чтение (глава 4):  
Праведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости, житие нескверное. Благоугоден Богови быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесьть прельстит душу его. Рачение злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его. Сего ради потщася от среды лукавствия. Людие же видевшие и не разумевшие, ниже положше в помышлении таковое: яко благодать и милость в преподобных Его, и посещение во избранных Его.

Премудрости Соломоновы чтение (глава 5 и 6):  
Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от

руки Господни, зане десницею покрывает я и мышцею защитит их. Примет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Примет щит непобедимый преподобие, поострит же напрасный гнев во оружие, споборет же с ним мир на безумных. Пойдут праволучныя стрелы молниины и, яко от благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навьикните, судии концев земли, внушите, держащие множества и гордящися о народех язык, яко дана есть от Господа держава вам и сила от Вышняго.

На литии стихира святаго, глас 4:

Светлая память успения твоего, / преподобне отче наш Филарете, / сердца наша веселит духовно: / зрим бо честную раку мощей твоих, / исцеляющую недужных, с верою к ней притекающая, / и славим Господа, тя прославльшаго, / труды и подвиги твоя увенчавшаго / толикою чудес благодатию.

На стиховне стихирь, глас 2:

Подобен: Доме Евфрафов:

Дом Духа Святаго / явился еси, преподобне, /  
благодатию Господней, / просвещая и наставляя  
всех / верою притекающих к тебе.

Стих: Чесна пред Господем смерть преподобных  
Его.

Блажен воистину / и кроток явился еси, /  
преподобне отче наш Филарете, /  
монашествующих наставниче / и Троицы  
верный служителю.

Стих: Блажен муж, бояйся Господа, в заповедех  
Его восхощет зело.

Учителю благочестия, / Православия поборниче,  
/ монашескаго жития истовое правило, /  
Филарете отче наш, / любовьию днесь ты  
ублажаем.

Слава, глас и подобен тойже:

Обители Глинския сокровище, / ходатаю за  
люди твоя неусыпный, / преподобне отче  
Филарете, / помяни нас любовьию чтущих ты / у  
Престола Вседержителя.

И ныне, Богородичен, глас и подобен тойже:  
Приидите возвеличим, / Пречистую Богородицу  
/ и обители Ея служителя, / монахов  
начальника, / преподобнаго игумена Филарета.

### Тропарь святаго, глас 1:

Пустыни Глинския строитель / и боголюбивый  
игумен явился еси, / Богоносе отче наш  
Филарете: / постом, бдением и молитвою  
Небесная дарования прием, / исцеляеши  
недужныя и души верою притекающих ти. /  
Слава Давшему тебе крепость, / слава  
Венчавшему тя, / слава Действующему тобою  
всем исцеления.

### НА УТРЕНИ

По 1-м стихословии седален, глас 5:

О земных и тленных наслаждениях нерадив, /  
Христу последовал еси, блаженне, / и пустынное  
жительство возлюбил еси, / сего ради и  
постническому лику преподобных сочетатися  
сподобился еси, / с нимиже молися Господеви,  
Фитарете, / грехов оставление даровати /  
празднующим святую память твою.

Слава, и ныне, Богородичен, глас тойже:  
Утвердися пети сердце мое, Всенепорочная  
Дево, / Пречистое Рождество Твое, / имже  
избавила еси нас прародительныя клятвы / и  
вознесла еси падшее человеческое естество к  
высоте, / темже Тя по долгу поем и величаем.

По 2-м стихословии седален, глас 3:

Память твою всесветлую возвеличим днесъ, /  
всечестне отче наш Филарете: / ты бо Небесныя  
дары приемлещи, / имиже подаеши недугов  
исцеления приходящим к тебе с верою, / и  
молишися к Богу, / да подаст миру велию  
милость.

Слава, и ныне, глас тойже:

Чертог, присносущною славою украшен, видяще  
выну, / желание имама совнити в оны, / но,  
одежды не имущи, стыдимся, / да не связаны от  
Ангел и извержени будем. / Ты, сущи одежда  
нагих дерзновения, Дево Марие, украси ны / и  
введи внутрь Небеснаго Чертога.

По полиелеи седален, глас 8:

Днесъ ликует твоя обитель, / созывая верныя к  
торжеству памяти твоей, / преподобне отче  
Филарете, / иноков отец чадолюбивый, /  
благочестия церковнаго рачителю, / Православия  
проборниче, / царей богомудрый собеседниче /  
и присный молитвениче о душах наших.

Слава, и ныне, Богородичен:

Богородице Дево, / Вседержавная наша Царице,  
/ омофором молитв Твоих покрывающая весь  
мир, / прими от благодарных сердец наших /  
похвальныя песни сия / и испроси нам у Сына

Твоего Богоначального / грехов прощение и велию милость.

Таже степенна, 1-й антифон, глас 4.

Прокимен, глас 4: Честна пред Господем смерть преподобных Его. Стих: Что воздам Господеви о всех, яже воздаде ми?

Всякое дыхание:

Евангелие от Матфея, зачало 43.

По 50-м псалме стихира самогласна, глас 6:  
Преподобне отче наш Филарете, / по имени твоему бысть и житие твое, / измлада бо возлюбил еси во след заповедей Господних ходити / и всяку добродетель исполнил еси, / сего ради дом Духу Святому / свят и честен явился еси, / боголюбезными деяньми / и чудес дарованьми обогатився.

Канон святому, егоже краегранесие:

Игумена славнаго Филарета восхвалим. Глас 2.

Песнь 1.

*Ирмос: Грядите, людие, / поим песнь Христу Богу, / раздельшему море, / и наставльшему люди, яже изведе из работы египетския, / яко прославися.*

Игумена славнаго обители Глинския, воспоим днесь, вернии, Филатера богомудраго, да его

молитвами спасение улучим.

Господа от юности твоей возлюбил еси, отче, и ничтоже предпочел еси паче любви Его, и ныне сияеши, яко солнце в чертозах Триипостаснаго Божества, Филарете всечудне.

Умом выну Господу предстоя, отче преблаженне Филарете, попечение непрестанное о твоей обители имел еси, сего ради поют тебе чада твоя песни благодарственные.

Богородичен: Мати Препоблагословенная, радуйся, Владычице Дево, всем людям похвала, непрестанно молися Христу Богу сохранить место сие и люди молитвами всеблаженнаго Филарета.

### Песнь 3.

*Ирмос: На камени мя веры утвердив, /  
разширил еси уста моя на враги моя. /  
Возвесели бо ся дух мой, внемда пети: / несть  
свят, якоже Бог наш, / и несть праведен паче  
Тебе, Господи.*

Единому Богу возложив душу и помышление, тесный путь шествовал еси, тем получил еси Небеснаго Царствия наслаждение.

Назираеши с Превыспренних за обителию и стадом, еже собрал еси, блаженне отче, и николиже любви твоя преста от нас. Сие добре введуще, радуемся и прославляем дивнаго во

святых Своих Господа.

Апостольстей любви подражателю, богоприятне отче наш Филарете, непрестанно стадо твое вопиет ти: молитвами своими ко Господу спаси нас, молим тя.

Богородичен: Спасение родила еси человеком и обновление принесла еси нам, обетшавшим грехми, Дево, Мати Божия.

Седален, глас 4:

Твердостию разума украшаяся и плотския тяготы отверг, многокозненнаго стрелы притупил еси, преподобне Филарете, Богопросвещен соделался еси, тем же и нас помяни, святче Божий, чтущих любовью святую память твою.

Слава, и ныне, Богородичен:

Покров Твой, Дево Богородице, простри над смиренными воспеватели Твоими и сохрани нас от бед и скорбей, матернюю любовь к нам недостойным являюще.

Песнь 4.

*Ирмос: Пришел еси от Девы, / не ходатай, ни Ангел, / но Сам, Господи, воплощся, / и спасл еси всего мя человека. / Тем зову Ти: / слава силе Твоей, Господи.*

Любовь твою и попечение не отыми от нас, отче

любоблагоутробне, но посещай нас милостию и щедротами, по долгу тя славящих.

Аще и преставился еси, отче, к Небесней славе, но чудес источник оставил еси во обители твоей - цельбоносныя мощи твоя, ихже любовию лобызающе, благословение твое приемлем.

Велиим благоразумием, отче наш Филарете, покорил еси духови гордость ума житейскаго, все упование возложив на Бога, со смирением поя: слава силе Твоей, Господи.

Богородичен: Нас, вопиющих к Тебе, Дево, от страстей свободи и Владыце, Сыну Твоему, яко церковь освященну, принеси.

### Песнь 5.

*Ирмос: Света подателю и веков Творче, Господи, / во свете Твоих повелений настави нас; / разве бо Тебе иного бога не знаем.*

Ангельски пожив на земли, возвысился еси, отче, к лицезрению красоты Небесныя, еяже ныне наслаждаяся, молишися о спасении нашем.

Глинскую обитель вельми украсил еси, блаженне отче, таже устав монашескаго жития утвердил еси, наставляя, и уча, и приводя собор иноков к Божественней воли.

О славе твоей ликуют собрания монашествующих, молебный совершающе

праздник в честней памяти твоей, от души  
вопиюще: поминай нас, приснопоминающих тя.  
Богородичен: Филарета предстательством,  
служителя Твоего, Пречистая, исцели,  
изъязвленную страстями душу мою, матернею  
Твоею молитвою Божественное врачевание  
прилагающе.

### Песнь 6.

*Ирмос: В бездне греховней валяясь, /  
неизследную милосердия Твоего / призываю  
бездну: / от тли, Боже, мя возведи.*

Избави обитель твою, преподобне, от всякаго  
навета вражия и исполни ю любви и благодати,  
еже не помышляти о житейских, но  
душеспасительныя достигнути доброты  
молитвами твоими.

Ликует и веселится днесь твое словесное стадо,  
Филарете достопамятне, посреде имуще честныя  
мощи твоя, источающия струи благодати, верою  
притекающим к тебе.

Ангелов совозславниче Премудрости  
Вседержителейы, блаженне отче Филарете,  
помози нам о Горнем мудрствовати и на  
Промыслителя Господа нашего все упование  
возлагати.

Богородичен: Радование человеком, ангелов  
прославление, Богородице Всечистая, спаси всех

к Тебе прибегающих и Заступницу Тя в житии своем полагающих.

#### Кондак, глас 4:

Празднует днесь обитель Глинская / праздник пресветлый светоносная твоя памяти, / созывая православных собори, / радуется бо, яко стяжав сокровище велие — / честная мощи твоя, преподобне Филарете, / юже сохраняй всегда молитвами твоими от всех зол, да зовем ти: / радуйся, отче богомудре.

#### Икос:

Игумена достославнаго ублажим любовью, вернии, / Филарета - отца монахов множества, / строителя обители Глинския люботруднаго, / православия и благочестия отеческаго поборника, / иноческаго жития истовое правило. / Темже радостию притекающе к раце мощей его / и любовь поминающе, прилежно вопием: / радуйся, отче богомудре.

#### Песнь 7.

*Ирмос: Телу златому премудрыя дети не послужиша, / и в пламень сами поидоша, / и боги их обругаша, / среди пламене возопиша, и ороси я Ангел: / услышася уже уст ваших молитва.*

Евангелия деятельный проповедниче, и монашескаго жития ревнителю, испроси, отче Филарете, мир Церкви Христовей, людем здравие и Отечеству в вере Православней твердое стояние.

Тленная оставль, треблаженне, нетленная восприял еси, насыщаяся светом Божественных светлости во дворех Господа своего, Филарете премудре.

Авва чадолюбивый и наставник братии твоей любомудрый явился еси, отче Филарете, и отец отцов множества, возсиявших во обители Пречистыя Богоматери.

Богородичен: Владычице Милостивая, не возгнушайся язвами нашими греховными, Врача рождающая душ и телес наших, утоли болезни и исцели неможения, и спаси души наша.

### Песнь 8.

*Ирмос: В пещь огненную ко отроком еврейским снизшедшаго, / и пламень в росу преложшаго Бога, / пойте дела яко Господа, / и превозносите во вся веки.*

От страстей тимения чиста тя обрет, Всесвятый Дух вселися в тя, отче наш Филарете, Того стяжати и нам помолися, да единомудренно хвалим Утешителя и превозносим во вся веки.

Светлостью подвигов Богоприятных просиял

еси, отче, и восприял еси благодать и дерзновение молитися о нас, вспомоществуя верным в подвизах спасения.

Христу молися о нас, преподобне отче Филарете, да благочестно поживше и Богови благоугодивше, причастницы явимся жизни вечныя.

Богородичен: Всечистая Богоотроковице, Мати Спасителя нашего Господа, умилосердися над воспеватели Твоими и ослабу страстей нам подаждь.

### Песнь 9.

*Ирмос: Безначальна Родителя Сын, Бог и Господь, / воплощься от Девы нам явися, / омраченная просветити, / собрати расточенная: / тем всепетую Богородицу величаем.*

Агнца Божественнаго вечнаго брака причастниче, от славы твоея Небесныя призри на нас, любовию тя похваляющих, отче всесвященне, и потщися избавити нас от напастей и скорбей.

Лобзание словесное прими от нас, любоблагоутробне отче, и не престай простирати о нас моление, яко отец чадолюбивый, и помогай нам, прибегающим к тебе и чтущим тя, яко сосуд благодати Божия избранный.

Истинно славна и всехвальна память твоя, отче Филарете, славою бо, еже от Отца, Сына и Святаго Духа, прославлен еси.

Богородичен: Мати Всечистая Христа Спаса нашего, немощствующи нас и расслабленных воздвигни от тли греховныя к пению Сына и Бога Твоего.

Светилен, глас 2:

Светозарна светильника веры, во стране нашей возсиявша и солнца светлейше благодатию нас просвещша, Филарета предивнаго песньми восхвалим.

Слава, и ныне, Богородичен: Славословие Тебе приносим, Мати Дево, явившей миру Свет Присносияющий, тьму неверия и греха расточающий, и присною радостию души наша исполняющий.

На хвалитех стихиры святаго, глас 4: Приидите, благоверных людей множества, / светло празднуим память святаго постика, / премудраго наставника, / преподобнаго старца Филарета, / игумена обители Глинския, / с любовью вопиюще к нему: / твоими молитвами ко Христу Богу / от всякия скорби и беды избави нас.

В Глинскую пустыню вселився, отче богомудре,

/ чада послушания в ней духовно породил еси /  
и Богови сия привел еси / учением твоим  
святым, / еже всем бысть на пользу душевную, /  
Филарете приснопамятне.

Преподобне отче Филарете, / ты Евангелия  
Христова свет стезям твоим имел еси / и был  
еси пастырь добрый и игумен премудрый / тебе  
врученнаго иноческаго стада, / руководя  
духовная чада твоя путями правыми / в  
Царство Небесное.

Преподобне отче Филарете, / возлюбив всем  
сердцем обитель Пречистыя Богородицы, / по  
Бозе все упование твое на Ту возложил еси, / и  
храм в пустыни твоей во славу Иверскаго Ея  
образа воздвигл еси, / и многия души  
человеческия привел еси, угодниче Божий, / в  
Царство Небесное.

Слава, глас 8:

Явился еси светильник благодатный, /  
преподобне отче Филарете, / кротким светом  
любве и смирения сияя / и нас милостию твоею  
озаряя. / Темже и мы, благодарне чтуще память  
твою, / вопием тебе усердно: / молися о нас ко  
Господу, пастырю наш добрый, / да спасет  
души наша.

И ныне, глас тойже:

Владычице, прими молитвы раб Твоих / и  
избави нас от всякия нужды и печали, / Ты еси,

Богородице, оружие наше и стена, / Ты еси  
Заступница, и к Тебе прибегаем, / Тя и ныне на  
молитву призываем, / да избавиши нас от  
врагов наших. / Возвеличим Тя вси, /  
Всенепорочную Матерь Христа Бога, / Юже  
осени Дух Пресвятой.

Славословие великое и отпуст.

### НА ЛИТУРГИИ

Блаженны от канона песнь 3-я и 6-я. Прокимен,  
глас 7: Честна пред Господом / смерть  
преподобных Его. Стих: Что воздам Господеви о  
всех, яже воздаде ми? Апостол к Галатам, зачало  
213. Аллилуиа, глас 4: Праведник, яко финикс,  
процветет, / яко кедр, иже в Ливане,  
умножится. Стих: Насажденнии в дому  
Господни во дворех Бога нашего  
процветут. Евангелие от Луки, зачало 24.  
Причастен: В память вечную будет праведник:

[Служба преподобному Филарету составлена  
**протоиереем Илией Тетерько**, клириком г.  
Одессы]